

# U-OBHADIYA

1 Umbono ka-Obhadiya.

Nanku okutshiwo nguJehova Wobukhosin  
nge-Edomi –

Sizwile ilizwi elivela kuJehova:  
Isithunywa sathunywa ezizweni ukuba  
sithi,  
“Phakamani, asihambeni silwe laye  
impi”–

<sup>2</sup> “Khangelia, ngizakwenza ube  
mncinyane phakathi kwezizwe;  
uzakweyisa kakhulu.

<sup>3</sup> Ukuzigqaja kwenhliziyo yakho  
sekukukhohlisile,  
wena ohlala ezingoxweni zamadwala  
wakhe umuzi wakho eziqongweni,  
wena ozitshela uthi,  
‘Ngubani ongangiwisela phansi  
enhabathini na?’  
<sup>4</sup> Lanxa uqonga njengengqungqulu  
wakhe isidleke sakho phakathi  
kwezinkanyezi,  
ngizakwethula khonale,”  
kutsho uJehova.

<sup>5</sup> “Nxa amasela efike kuwe,  
nxa abaphangi ebusuku –  
Awu, yeka ubukhulu bomonakalo  
okulindeleyo –  
kabayikuntshontsha kuphela lokho  
okwanele abakufunayo na?  
Uma abavuni bamavini befike kuwe,  
baneke batshiye amalutshwazana na?

<sup>6</sup> Kodwa yeka ukuphangwa  
okuzakwenziwa u-Esawu,  
inotho yakhe efihliweyo izathunjwa!

<sup>7</sup> Bonke abamanyane lawe  
bazakuxotshela emngceleni;  
abangane bakho bazakukhohlisa  
bakunqobe;  
labo abadla ukudla kwakho  
bazakuthiya ngomjibila,

kodwa wena kawuyikuwubona.

<sup>8</sup> “Ngalolosuku,” kutsho uJehova,  
“kangiyikuwabhubhisa yini amadoda  
ahlakaniphileyo ase-Edomi,  
amadoda aqedisisayo ezintabeni  
zako-Esawu na?

<sup>9</sup> Amabutho akho, wena Themani,  
azathuthumela,  
njalo bonke abasezintabeni zako-Esawu  
bazacakazelwa phansi ekubulaweni  
kwabanengi.

<sup>10</sup> Ngenxa yodlakela kumfowenu  
uJakhobe,  
uzakwembeswa lihlazo; uzachithwa nini  
lanini.

<sup>11</sup> Ngosuku owema ngalo khatshana  
nxatshana izihambi zithumba inotho  
yakhe  
labezizweni bengena emasangweni  
akhe bephosa inkatho ngeJerusalema,  
wawunjengomunye wabo.

<sup>12</sup> Akumelanga weyise umfowenu  
ngosuku lokuhlupheka kwakhe,  
loba uthokoze ngabantu bakoJuda  
ngosuku lokubhujiswa kwabo,  
loba uklamase kangaka  
ngosuku lokuhlupheka kwabo.

<sup>13</sup> Akumelanga ungene ngamasango  
abantu bami  
ngosuku lomonakalo wabo,  
loba ubeyise esizini lwabo  
ngosuku lomonakalo wabo,  
loba uthumbe inotho yabo  
ngosuku lomonakalo wabo.

<sup>14</sup> Akumelanga ume emahlukanandlela  
ukuba ubulale ababalekayo babo,  
loba unikele abaphephileyo babo  
ngosuku lokuhlupheka kwabo.

<sup>15</sup> “Usuku lukaJehova selusondele  
ezizweni zonke.  
Njengalokho okwenzileyo,  
yikho okuzakwenziwa kuwe;  
izenzo zakho zizaphendukela phezu  
kwekhanda lakho.

<sup>16</sup> Njengokunatha elakwenzayo entaben  
yami,  
ngokunjalo izizwe zonke  
zizanatha njalonjalo;  
zizanatha, zinathe  
kuze kube angathi  
kazizange zivele zibe khona.

<sup>17</sup> Kodwa phezu kweNtaba iZiyoni  
kuzakuba lokusindiswa;  
kuzakuba ngcwele,  
lendlu kaJakhobe  
izazuza ilifa layo.

<sup>18</sup> Indlu kaJakhobe izakuba ngumlilo  
lendlu kaJosefa ibe lilangabi;  
indlu ka-Esawu izakuba libibi,  
njalo bazayithungela ngomlilo  
ozayiqothula.  
Akuyikuba khona abasilayo  
endlini ka-Esawu.”

UJehova usekhulumile.

<sup>19</sup> Abantu abavela eNegebi  
bazathumba izintaba zako-Esawu,  
abantu abavela emawatheni ezintaba  
bazathumba ilizwe lamaFilisti.  
Bazathumba amasimu ako-Efrayimi  
lawaseSamariya, loBhenjamini  
uzathumba iGileyadi.

<sup>20</sup> Lelibutho labako-Israyeli  
abathunjwayo abaseKhenani  
lizalithatha ilizwe kusiyafika  
eZarefathi;  
abathunjwa eJerusalema  
abaseSefaradi  
bazathatha amadolobho aseNegebi.

<sup>21</sup> Abakhululi bazakhwela iNtaba iZiyoni  
ukuba babuse izintaba zako-Esawu.  
Njalo umbuso uzakuba ngokaJehova.